



Siverth K. Heilmann
Atassut

UKA 2021/90-97-57
19. oktober 2021

Tunup sineriaani qilalukkanik qernertanik kisitsinissap piniartunik piffinni ilisimasaqarluartunik peqataatitsisup 2022-imi aallartinnissaa pillugu Naalakkersuisut peqquneqarnissaannik inatsisartut aalajangiiffigisassaattut siunnersuut.
(inatsisartunut ilaasortaq Harald Bianco & Knud Mathiassen, Inuit Ataqtigiit)

Naalakkersuisut Nunatta kangiani qilalukkanik qernertanik piniartut ilisimasaannik atuilluni kisitseqqissaqqullugit peqquneqarnissaannik inatsisartut aalajangiiffigisassaattut siunnersuut. Kisitseqqissaarneq siunissami nunatta kangianut pisassiisarnermut tungaviliissaaq.
(Inatsisartuni ilaasortaq Lars Poulsen, Siumut)

Ittoqqortoormiini Tasiilallu eqqaani qilalugartassat qernertat siunissami pisassiisuteqartarnissaq pillugu apeqquteqaat aallaavigalugu oqallisissiatut siunnersuut.
(Inatsisartuni ilaasortaq Emanuel Nûko, Naleraq)

Aallaqqaammut Atassummiit qutsavigissavagut, inatsisartuni ilaasortat, Harald Bianco aamma Knud Mathiassen, Inuit Ataqtigiinneersut aamma Lars Poulsen, Siumut, Tunup sineriaani piniartunik ilisimasaqarluartunik peqateqarluni, qilalukkanik qernertanik kisitsinissamik siunertaqarnerannut kiisalu Emanuel Nûko, Naleraq Ittoqqortoormiini Tasiilamilu qernertanik pisassiisarnissaq pillugu, apeqquteqaallu aallaavigalugu oqallisissiaqarneranut. Taakkulu tamaasa ataatsimoortillugit imatut Atassummiit oqaaseqarfigissavagut.

Qulequttat tungavilersuutillu ilisarnarluartut, 1990-ikkut qiteqqunneranniilli ukiunilu qaninnerni maani inimi, piniartut biolog-illu ilisimasaannik suleqatigiinnerunissamillu Atassummiit ujartuiffigiarsimasagut qaqilerneqarmata, soorunami nuannaarutigalugit tungaviatigut tapersiinerput oqaatigeriissavarput.

Pinngortitaq aqussinnaanngilarput, inatsisartunili sulinitinni peqqussusiornitsigut Naalakkersuisut pisussaaffilersortarpagut, pisuussutit uumassusillit aqunnerannut sullitagut eqaatsumik suleriuseqarnissaat siunertaralugu. Naalakkersuisut agguataarneqarnerat malillugu, Aalisarnermut piniarnermut Naalakkersuisoq pisassiisarnermut pisinnaatitaavoq. Avatangiisinulli Naalakkersuisoq immikkoorpoq Aalisarnermut Piniarnermullu Naalakkersuisuusup avaqqukkuminaatsittarpaat pinngortitaleriffimmiit biolog-it inassuteqartarnerat.

Atassutip pisuussutit uumassusilinnik atuinerput ilisimasanillu nalilersuinerni, atuisut biolog-illu suleqatigiinnerusariaqartugut oqariartuutigiuarparput.

Sikuunerusarallarmat qilalukkanik qaqortanik qernertanillu avannaani sassisarnerpassuit sikuunerusarallarmat ilutigalugu allanngornikuuvoq aammalu unguisilluni qilalukkanik inerteqquteqalersitsisimanerput qangaaniilli atuutilereernikuuvoq. Iami arferpassuit aarluillu ilanngullutik Nunatta imartarujussuani piniakkatsinnut ilanngartuisunngorsimaneri puigorneqarsimappat eqqaasissutigeqqiinnassavarput.

Aalisagaappata piniagassaappataluunniit ilisimatuussutsikkut nalunaarusiarpassuit inatsisartuni inuiaqatigiillumi akunnitsinni tapersersuilluta assertuisarlutalu oqariatuuteqartaqaagut. Naatsumilli Atassut tunuliaqutaralugu uumasorsiuunik naliliisarnerit eqqortuviunnginnerannik uparuateqartarnigut amerlanerpaatigut manna tikillugu takussutissaqarmata.

Qujanartumilli aamma qilalukkat qaammataasakkut malinnaavigineqarsinnaanerannut atatillugu biolog-it piniartunik suleqateqarluartalernerat takussutissaavoq pitsaasoq.

Timmisartumik kisitsineq akisoqisoq imminik ajunngikkaluartoq, taamaattoq Atassummiit angalasut kikkulluunniit sineriarujussuatsinni qilalukkanik qernertanik qaqortanilluunniit piffimmi uani ulloq amerlassutsillu missingerneqarlutik, komuune-mut Naalakkersuisoqarfimmuut nalunaaruteqartarnissap piviusunngortinneqartariaqartoq. Taamaalilluta nalilersuinerit eqqornerusut suleqatigiissutigineqarsinnaaqullugit.

Naggataagut siunnersuuteqartut piniakkat ikiliartuinnartitsinerannik ernumassuteqarnerat Atassummiit paasisinnaalluarparput. Taamaattumik pisariaqarluinnarpoq, inatsisartuugutta, Naalakkersuisuugutta Biolog-iuguttaluunniit immitsinnut assertuuterusaarnerput qaangertariaqalerparput.

Naalakkersuisut pisasseeqikkaangata biolog-it isumartik uniorneqaraangat tusagassiorfitsigut tutsiuttarnerat, nammineq akisussaaffigaluaaraat, inatsisartut Naalakkersuisulluunniit eqqungitsumik aalajangiisutut nalilerneqartuarterat paaseqatigiinninngorlitoq.

Taamak siunnersuutinut naalisaagaluqaluta manna ataatsimiititaliamut susassaqartumut peqqissaarullugu suliarineqarnissaat Atassummiit inassutigaarput.

Qujanaq.